

# SIARAN AKHBAR

## **TH SERAH ZAKAT RM2.1 JUTA BAGI KEMASLAHATAN ASNAF SABAH**

**KOTA KINABALU, 11 November 2021** – Lembaga Tabung Haji (**TH**) hari ini menyerahkan Zakat **TH** berjumlah **RM2,104,543.47** bagi tahun kewangan berakhir 2020 kepada Majlis Ugama Islam Sabah (MUIS) dalam satu majlis bertempat di Pejabat Ketua Menteri, Sabah.

Serahan zakat ini disampaikan oleh Pengarah **TH** Wilayah Sabah dan Sarawak, YBhg. Datin Hajah Nurlaila binti Haji Said kepada Timbalan Yang Dipertua MUIS, Ustaz Malai Ali Malai Ahmad. Majlis serahan ini turut disaksikan YAB Datuk Seri Panglima Haji Hajiji bin Haji Noor, Ketua Menteri Sabah. Bayaran zakat bagi negeri Sabah ini mencatatkan peningkatan berbanding tahun 2020 (RM1,774,247.05).

“Saban tahun **TH** melaksanakan bayaran zakat yang merupakan sebahagian daripada tanggungjawab **TH** sebagai sebuah organisasi Islam yang prihatin dengan sasaran untuk memperkasakan kewangan Islam dan pembangunan sosio-ekonomi ummah bagi manfaat khususnya golongan asnaf di Negeri Sabah,” kata Datin Hajah Nurlaila.

**TH** berharap pembayaran zakat ini dapat dimanfaatkan oleh MUIS ke arah kemampanan program-program zakat yang dirangka di negeri ini bagi kelestarian ekonomi golongan asnaf, tambahnya lagi.

Jumlah keseluruhan bayaran Zakat **TH** 2020 terus mencatatkan peningkatan di seluruh negeri sebanyak RM100,416,202.83 berbanding RM86,185,327.00 pada tahun 2020.

Terdahulu pada 30 Oktober yang lalu, **TH** telah menyerahkan sumbangan van menerusi Program Mobiliti buat julung-julung kalinya di negeri ini. Sepanjang tahun 2020, **TH** terus memperkasakan lagi aspek kebertanggungjawabannya dengan pelaksanaan pelbagai program zakat bersasar khususnya kepada golongan yang memerlukan melalui pengagihan bagi tujuan pendidikan, keusahawanan, kebajikan dan kemasyarakatan. Inisiatif ini juga membolehkan **TH** menganjurkan program-program tanggungjawab sosial korporatnya yang memberi impak positif berganda kepada golongan asnaf.

Pada tahun ini, **TH** turut memperuntukkan RM18.7 juta bagi melaksanakan program lain seperti Program Ehsan - program bantuan kewangan untuk golongan asnaf yang memerlukan seperti warga emas, ibu/ bapa tunggal dan golongan kurang upaya; Program Ikhtiar - membantu golongan asnaf melalui suntikan modal perniagaan ; Program Iqra' –menyediakan bantuan kewangan dan keperluan kepada pelajar asnaf di beberapa universiti awam dan institusi terpilih; dan Program A'fiat - yang melibatkan sumbangan alat bantuan sokongan kesihatan.

Majlis yang berlangsung penuh dengan pematuhan Prosedur Operasi Standard (SOP) yang ditetapkan oleh Majlis Keselamatan Negara dan Kementerian Kesihatan Malaysia ini turut dihadiri oleh YB Datuk Hj. Mohd Arifin bin Hj. Mohd Arif, Menteri Tugas-tugas Khas Sabah; Tuan Haji Yusdi bin Nasip, Pengarah **TH** Negeri Sabah; para pengurusan kanan MUIS dan anggota-anggota **TH**.

**-Tamat-**

## **LEMBAGA TABUNG HAJI**

Lembaga Tabung Haji (**TH**) merupakan sebuah badan berkanun yang ditubuhkan oleh Kerajaan Malaysia pada tahun 1963 dan ditadbir berdasarkan Akta Tabung Haji 1995 (Akta 535). **TH** menyediakan kemudahan bagi umat Islam di negara ini merancang simpanan bagi menunaikan ibadat haji.

Sebagai sebuah institusi haji terunggul negara dan mempunyai lebih 58 tahun pengalaman, **TH** sentiasa berusaha menyediakan perkhidmatan yang komprehensif dan sistematik demi menjaga kebaikan jemaah haji Malaysia (tidak termasuk urusan umrah). Selain diberi tanggungjawab dan amanah untuk menguruskan simpanan pendeposit serta urusan haji yang efisyen, **TH** turut menjalankan aktiviti pelaburan dalam dan luar negara yang berlandaskan syariah bagi memberi nilai tambah kepada simpanan para pendeposit.

Pencapaian **TH** yang konsisten ini telah mendapat pengiktirafan dunia sebagai model pengurusan haji inovatif dan mempunyai hampir sembilan juta pendeposit serta 123 cawangan dengan lebih 10,000 'touch-points' di seluruh negara. **TH** turut mempunyai sebuah pejabat yang beroperasi di Jeddah, Arab Saudi di bawah Konsulat Malaysia.

Untuk maklumat lebih lanjut mengenai perkhidmatan **TH**, sila lawati [www.tabunghaji.gov.my](http://www.tabunghaji.gov.my) atau hubungi Pusat Panggilan **TH** (THCC) di talian 03-6207 1919. Keterangan lanjut mengenai siaran akhbar ini, sila hubungi:

|   |   |
|---|---|
| <b>Affan Aimaduddin Azami</b><br>Penolong Pengurus<br>Bahagian Komunikasi Korporat<br>Lantai 16, Menara <b>TH</b> Tun Razak<br>201 Jalan Tun Razak<br>Kuala Lumpur<br>Tel: 03 2054 2238<br>Tel. Bimbit: 019 984 7138<br>Faks: 03 2164 0436<br>Emel: affan.aimaduddin@lth.gov.my | <b>Mohamad Naser Jaffar</b><br>Pengurus Kanan<br>Bahagian Komunikasi Korporat<br>Lantai 16, Menara <b>TH</b> Tun Razak<br>201 Jalan Tun Razak<br>Kuala Lumpur<br>Tel: 03 2054 2451<br>Tel. Bimbit: 019 200 8438<br>Faks: 03 2164 0436<br>Emel: naser@lth.gov.my |
|---|---|